

CONVOCATORIA E BASES REGULADORAS DO 35º CERTAME DE NARRACIÓNS BREVES MANUEL MURGUÍA

1. Obxecto:

O Concello de Arteixo convoca o **35º Certame de Narracións Breves "Manuel Murguía"**, coa finalidade de **promover a creación literaria galega, apoiar o talento narrativo e honrar a figura de Manuel Murguía**, impulsando a difusión da narrativa contemporánea escrita en lingua galega.

2. Participantes:

Poderán participar todas as **persoas maiores de 16 anos** que presenten unha única obra conforme a estas bases.

Non poderán concorrer persoas que incorran nalgunha das causas de prohibición dispostas no artigo 13 da Lei 38/2003, de 17 de novembro, xeral de subvencións (LXS).

3. Características das obras:

- a. **Xénero:** Narración breve.
- b. **Lingua:** galega.
- c. **Temática:** libre.
- d. **Orixinalidade:** obras orixinais, inéditas e non premiadas nin pendentes de resolución noutros concursos.
- e. **Extensión:** entre 30.000 e 70.000 caracteres con espazos, o que aproximadamente se corresponde entre 15 e 30 páxinas.
- f. **Formato de presentación:**
 - Word, LibreOffice ou similar, en páxinas numeradas, tamaño DIN A4, letra Arial, corpo 12, interliñado dobre, marxes de 2,5 cm.
 - A obra literaria **non conterá en ningún caso o nome da persoa autora**, só título e lema/pseudónimo.

4. Presentación das obras:

A presentación realizarase preferentemente por **vía telemática**, mediante o procedemento de "[solicitud xeral](#)" da sede electrónica do Concello.

Deberán cargarse tres arquivos separados:

- a. **Obra literaria** (Word, LibreOffice ou similar) identificada só con título e lema/pseudónimo.
- b. **Plica** (PDF): nome e apelidos, copia do DNI, enderezo postal e electrónico, teléfono, currículo literario breve.
- c. **Declaración responsable** (PDF) sobre os seguinte puntos (segundo anexo):
 - A obra presentada é **inédita** e non foi premiada noutro certame ou concurso ata a data da súa presentación.
 - Dá a súa **conformidade** á cesión dos dereitos de edición da obra (incluídos os de publicación, distribución e explotación) ao Concello de Arteixo, por un prazo de **cinco (5) anos** desde a data de concesión do premio.

- Outorga o seu **consentimento expreso** para o tratamento dos datos persoais incluídos na plica coa finalidade de enviar información relacionada co Certame de Narracións Breves Manuel Murguía, de conformidade coa Lei Orgánica 3/2018, de 5 de decembro, de Protección de Datos Persoais e garantía dos dereitos dixitais.
- **Autoriza** ao Concello de Arteixo a verificar que se atopa ao corrente das súas obrigas tributarias e coa Seguridade Social perante a Axencia Estatal de Administración Tributaria, a Administración Tributaria Autonómica, a Tesourería Xeral da Seguridade Social e o propio Concello de Arteixo, co fin de comprobar o cumprimento dos requisitos para a obtención do premio.

Admitiranse de xeito excepcional os relatos por correo postal. O sobre, sen remite, incluíra no exterior: "35º Certame de Narracións Breves Manuel Murguía" e enviarase ao seguinte enderezo:

Concello de Arteixo
Praza Alcalde Ramón Dopico, nº 1
15142 Arteixo
A Coruña

O sobre no seu interior deberá incluír a seguinte documentación:

- **A obra literaria en USB ou CD** (en formato Word, LibreOffice ou similar) identificada só con título e lema/pseudónimo e que reúna os requisitos de formato de presentación anteriores.
- **Un sobre pechado**, no que tamén serán visibles o título e o lema/pseudónimo, incluíra no seu interior **a plica**: nome e apelidos, copia do DNI, enderezo postal e electrónico, teléfono, currículo literario breve e a **declaración responsable**.

5. Garantía de anonimato das obras:

A organización do certame encargárase de manter o anonimato dos traballos presentados ocultando os metadatos dos arquivos que poidan identificar a persoa autora antes de ser enviados ao xurado.

6. Prazo de presentación das obras:

O prazo de presentación de orixinais comezará o día seguinte ao de publicación desta convocatoria no Boletín Oficial da Provincia (BOP) e rematará o **31 de xaneiro de 2026**.

7. Premios:

- 1º premio: 4.000 €
- 2º premio: 2.000 €
- 3º premio: 1.000 €

As contías estarán suxeitas ás retencións fiscais legalmente vixentes e aboaranse por transferencia bancaria. O xurado poderá declarar **deserto** todos ou algún dos premios se as obras non reúnen os méritos suficientes. Ningunha persoa poderá recibir máis dun premio.

8. Xurado:

O xurado estará formado por persoas de recoñecida experiencia e sensibilidade literaria, designadas polo Concello de Arteixo. Será este equipo quen valore, con criterio profesional e independencia creativa, as obras presentadas e quen faga pública a súa decisión inapelable o **8 de maio de 2026**.

O xurado, será asistido pola persoa designada polo Concello de Arteixo como director/a literario/a do certame, quen actuará como secretario/a asistindo as deliberacións con voz pero sen voto e levantando acta.

A Xunta de Goberno Local, como órgano competente, asumirá a resolución oficial dos premios a partir da proposta emitida polo xurado por maioría de votos.

As persoas que integren o xurado recibirán unha compensación económica polos seus traballos de lectura, deliberación e asistencia ao acto de entrega, que se aboará mediante transferencia bancaria e coa correspondente aplicación das retencións fiscais vixentes.

Correspóndelle ao xurado interpretar estas bases durante o proceso de avaliación, e calquera aspecto non contemplado nas devanditas bases será resolto pola organización da forma que resulte máis axeitada para o correcto desenvolvemento do certame.

9. Acto de entrega:

As tres persoas finalistas deberán estar presentes o día **8 de maio de 2026** no acto de entrega para recibir os premios, salvo ausencia debidamente xustificada.

10. Publicación e dereitos de autoría:

A contía dos premios inclúe o pagamento dos dereitos de autor relativos á primeira edición das obras no ámbito dun volume colectivo que poderá publicarse nos **5 anos seguintes á concesión dos galardóns**. As persoas autoras farán constar en edicións en papel ou electrónicas posteriores da súa obra que foi premiada neste certame.

11. Política de devolución:

Os orixinais non premiados presentados en formato CD ou USB poderán ser devoltos ás persoas autoras que o soliciten por escrito nun prazo máximo dun mes desde o ditame. Unha vez rematado ese prazo, os soportes que non fosen reclamados serán destruídos.

12. Protección de datos:

Os datos persoais serán tratados de xeito confidencial e poderán ser incorporados aos correspondentes ficheiros do Concello de Arteixo para o envío de información relacionada co Certame de Narracións Breves Manuel Murguía. O seu tratamento realizarase conforme á Lei Orgánica 3/2018 e ao Regulamento (UE) 2016/679. Poderanse exercer os dereitos de acceso, rectificación, supresión, limitación e oposición mediante solicitude dirixida ao Concello de Arteixo.

13. Aceptación das bases:

A participación no certame implica a aceptación íntegra destas bases e a conformidade coa resolución do xurado.

ANEXO:

MODELO DE DECLARACIÓN RESPONSABLE

D/Dña., con DNI nº maior de 16 anos e con domicilio a efectos de notificacións no correo electrónico, e dirección C/
.....
nº de teléfono.....actuando en representación de.....
con DNI..... ou no meu propio nome e representación;

DECLARA BAIXO A MIÑA RESPONSABILIDADE:

1. Que non me atopo incurso/a nalgunha das causas de prohibición para obter a condición de beneficiarios/as que establece o artigo 13 da Lei 38/2003, de 17 de novembro, xeral de subvencións (LXS).
2. Que a obra é inédita e que non foi premiada, ata a data da súa presentación, en ningún outro certame ou premio.
3. Que dou conformidade á cesión dos dereitos de edición da obra (incluídos os de publicación, distribución e explotación) **por un prazo de 5 anos** desde a data de concesión do premio.
4. Que outorgo ao Concello de Arteixo consentimento expreso para o tratamento dos datos persoais que constan na plica, de conformidade co establecido na Lei Orgánica 3/2018, de 5 de decembro de Protección de Datos persoais e garantía dos dereitos dixitais.
5. Que autorizo ao Concello de Arteixo a solicitar da Axencia Estatal e Autonómica de Administración Tributaria e da Tesourería da Seguridade Social e do Concello de Arteixo os datos relativos a cumprimento das súas obrigas tributarias para comprobar o cumprimento dos requisitos establecidos para obter, percibir e manter algún dos 3 premios do Certame de Narracións Breves Manuel Murguía. A presente autorización outórgase exclusivamente aos efectos do recoñecemento, seguimento e control da prestación mencionada anteriormente e en aplicación do disposto no artigo 95.1 K) da Lei 58/2003, Xeral Tributaria que permite, previa autorización do interesado, a cesión de datos tributarios que precisen ás AA.PP para o desenvolvemento das súas funcións.

(Lugar)....., (día).....de (mes).....de 202_

Sinatura